

Versehung vnd Willen den Durchleuchtigen Hochgebornen Fürsten vnnnd Herrn/ Herrn Johann Georgen Fürsten zu Anhalt/ Grafen zu Ascanien/ Herrn zu Zerbst vnd Bernburg &c. im Jahr CHristi 1618. am HimmelfahrtsTage/ durch einen sanfftten vnd sel. Todt zu sich in die ewige Frewd vnd Herrlichkeit auffgenommen/ Vnd J. F. G. vnsern gedachten Herrn Hoffmeister Sel. nebenst denen andern Herrn Räten/ auff jhren Todtbette gnädigst ersucht/ daß sie doch von dero Fürstlichen Kindern nicht außsetzen/ sondern mit gleicher trew jhnen dieselbige wolten anbefohlen seyn lassen: auch die Regierung auff vnsern gnädigen LandesFürsten vnnnd Herrn/ Herrn Johann Casimir/ Fürsten zu Anhalt etc. kommen/ Vnd von J. F. Gn. der verstorbene Sel. Herr Hoffmeister de novo zu dero Hoffmeistern/ Geheimen Rath vnd CammerRath/ wie dann auch im Jahre 1621. dem Herrn Cantzler D. Gottfried Mül-[Kij v]lern⁴³ zu einen Justien^c Rath adjungirt vnd zugeordnet worden/ Zwischen Johann Casimirs F. Gn. vnnnd Fräwlein Agnes Landgräfin von Hessen/ vnser anjetzo gnädigen Fürstin vnd Fraw/ im Jahr 1623.⁴⁴ Wie auch darauff zwischen Hertzog Wilhelms von Weymar/ mit Fräwlein Eleonora Dorothea von Anhalt im Jahr 1625.⁴⁵ Vnd dann letzlichen zwischen Graff Philip Moritzen von Hanaw/ vnd Fräwlein Sibylla Christina von Anhalt etc. im Jahr 1627.⁴⁶ mit gutem getrewen Rath/ nebenst den andern Herren Räten/ die jetzt erzehlte Eheberedungen alle also ins werck gerichtet/ daß er deswegen von allen Fürstlichen vnd Gräfflichen Personen/ vnd dero nahen Anverwandten sehr werth gehalten vnd favorisiret worden. [...]

[Kij r] Dann als im Jahr CHristi/ noch bey Fürst Johann Georgen Fürstl. Gn. löblicher Regierung/ zwischen dem domahligen Churfürsten von Meintz Schweickart von Kronenberg⁴⁷/ vnd dem newlichst verstorbenen Hertzog Friderich Vlrichen von Braunschweig vnnnd Lüneburg⁴⁸/ grosse Mißhelligkeiten vnd Landesgrentz streite sich ereugeten/ haben Fürst Johann Georg vnnnd Fürst Rudolph von Anhalt⁴⁹ F. F. Gn. Gn. hochlöblichstes Andenckens/ so sich auff beyder theile freundliches ersuchen zu Interponenten gebrauchen lassen/ vnsern Herrn Hoffmeister Sel. nebenst den noch anwesenden Herrn Cantzler D. Gottfried Müllern/ vnd auff Fürst Rudolphs F. Gn. seite Heinrich von dem Werder⁵⁰/ vnnnd Herrn Cantzler D. Andreas Knichen Sel. Gedächtnüs⁵¹/ nacher Nordhausen zu bevorstehenden gütlichen Tractaten abgeordnet/ und ob zwar damals denen lange Zeit hero gewährten Differenzen, nicht nach der Herren Interponenten Wunsch hat können abgeholfen werden/ so haben dennoch die Herren Commissarii, vnd vnter denselben vnser Herr Hoffmeister Sel. wegen seiner statlichen qualiteten, vornehmen Gaben/ vernünfftigen Bezeugungen/ erbawlicher conversation vnd trew-eifferigen vnpartheyischen einrahtungen vnd Christlichen vnterricht/ nicht allein grosses Lob vnd Danck erlanget/ sondern auch von beyden theilen in sonderbarem respect gewesen/ auch geliebet vnd gehret worden.

Nicht weniger ist er/ wie auch droben schon gedacht/ von Fürst Johann Casimirs F. Gn. vnserm Regierenden LandesFürsten zu vnterschiedlichen sachen vnd Legationen gebraucht worden/ wie er dann Anno 1620. von denen gesambten hochlöblichen Fürsten zu Anhalt/ auff den Unions [Kij v] Tag nacher Vlm